

pakaianya terbabas, menampakkan kedua-dua bahunya yang melepak, dan menjelaskan sekawasan dadanya yang bogel. Dia berdiri di hadapan ‘Abd Allāh dengan memberi pandangan yang jelas membayangkan di wajahnya yang perawan itu air mata yang berharap, gemar, tersimpan dengan perasaan rindu dan dahaga yang diharapkan dari ‘Abd Allāh, senyuman melebar selalu terukir di kedua-dua bibirnya yang manis. Dia berdiri tegak merintangi jalan yang dilalui oleh ‘Abd Allāh sambil bertanya kepadanya “Ke manakah tuan mahu pergi wahai ‘Abd Allāh?” ‘Abd Allāh menjawab pertanyaan perempuan itu dengan katanya “Saya mahu mengikuti ayah saya”. Di waktu ‘Abd Allāh belum pun terlupa segala peristiwa yang berlaku ke atas dirinya yang baru sekejap sahaja. Perempuan itu terus menyambung lagi tanpa menghiraukan ayah ‘Abd Allāh sendiri. Katanya: “Sesungguhnya tuan ini samalah nilai dengan unta-unta yang telah dikorbankan di sisi Kaabah. Sudika tuan berkahwin dengan saya?”

‘Abd Allāh memerhati kepadanya dengan penuh kehairanan. Dia merasa panas membakar seluruh lipatan batinnya, hatinya juga mulai digoncang oleh keindahan dan erti hidup yang selama ini terlindung liar dan terburu jauh. Dia kagum dengan kejelitaan perempuan yang berdiri di hadapannya itu.

(Bersambung)

Berita Khas:

Rombongan Kaum Muslimin Iraq

Pada bulan Julai 1967 yang lalu satu rombongan kaum Muslimin Iraq di dalam perjalannya ke Malaysia dari Indonesia telah sempat menziarahi kota Singapura selama 2 hari. Dalam masa kunjungan yang sesingkat itu mereka sempat menemui pemimpin-pemimpin kaum Muslimin di pulau ini bagi menerangkan soal kedudukan negara Palestin yang keseluruhannya telah dikenakan oleh tentera-tentera Israel.

Rombongan tersebut diketuai oleh al-Ustādh Abdul Ghani Shandalah — seorang *engineer* yang terkenal di dalam Kementerian Wakaf Iraq — anggota-anggota rombongan itu terdiri daripada Sāhib al-faḍīlah al-shaykh Abdul Aziz al-Badri — daripada Rābiṭah al-‘Ulamā’ al-‘Irāq — al-Ustādh al-Sayyid ‘Adnan al-Buka’ — Setiausaha Kuliah Usuluddin di Baghdad — Peguam al-Hājj Muhammad al-Alusi, Peguam al-Hājj Daud al-Attar, Dr. al-Hājj Saleh al-Samira’i — pensyarah di Universiti Baghdad dan al-Ustādh al-Hājj Saleh Abdullah Sarih — guru di sekolah tinggi pertukangan.

Rombongan tersebut berazam untuk menziarahi negara-negara Islam sebelum datang ke Singapura

rombongan itu telah melawat Indonesia dan berada di sana selama 8 hari. Selama berada di Indonesia, mereka sempat menemui pemimpin-pemimpin dan pembesar-pembesar negara, di antara mereka itu ialah Jeneral Abdul Haris Nasution, tuan Adham Khalid, tuan Saifuddin Zahari dan lain-lain lagi. Selain dari itu mereka sempat pula mengadakan beberapa kali perundingan dengan ketua-ketua parti Islam, dan mereka sempat menghadiri Kongres Parti Nahdatul Ulama di Bandung dan Kongres Maktab Pusat Kemajuan Islam Asia Afrika di Jakarta.

Semasa berada di Indonesia anggota rombongan dari Iraq itu telah diundang membaca khutbah Jumaat, berucap di dalam majlis-majlis perayaan umum, berceramah di radio dan televisyen serta mengadakan pertemuan khas dengan pemberita-pemberita akhbar tempatan bagi menerangkan soal-soal mengenai Palestin yang mereka anggap bukan sahaja soal yang mesti diperjuangkan oleh bangsa Arab tetapi juga wajib diperjuangkan bersama oleh sekalian kaum Muslimin yang berada di seluruh dunia Islam.